

huius mundi, à quibus venti principales flare animaduertuntur, atque hac de cauſa dicuntur illi Venti Cardinales vt in præcedentibus à nobis eſt declaratum, quare ex Bonis Angelis *Michaeli* Veni orientalis curam atque dominationem attribuunt Hebræorum Doctores, vt & *Raphaeli* illam occidentis, quorum ille ſubſolanus dicitur hic Fauonius, *Gabrieli* datur Septentrionis & venti principalis illius plagæ præfectura, vt & *Vrieli* Auſtri gubernatio.

Et ſciendum eſt quod quamuis quatuor ſpiritus ſeu dæmones deſtinentur ad ventorum cardinalium officium, videlicet *Oriens* ad ſubſolani directionem, *Paymon* ad illum Fauonii, *Egyn* ad Boreæ gubernationem, & *Amaymon* ad Auſtri præfectionem, qui & plures ſub ſe habent ad ſuam malitiam exequendam dæmonum legiones ſeu cohortes iſtis ſubſeruietes, tamen hi mali angeli (vt pote quibus eſt datum nocere cælo & terræ atque mari) bonorum prædictorum dominio ſubiiciuntur, ita vt ſine ipſorum venia & permiſſione ſeu potius voluntate & verbo DEI in ipſis relucente nihil mali poſſint in terris, in aqua, aut in aere, quemadmodum in conſequenti ſermone luculentius.

Sed & hoc verbis quidem expreſſioribus inſignire videntur Doctores Hebræorum, in ſecreta Theologia peritiores: Nam *Rabi Tedacus* qui in *Lib. de 10. numerationibus*, poſtquam de 4. ventis Cardinalibus verba ſatis aperta feciſſet, ſic pergit. Ex illis (inquiens) quatuor ventis creauit angelos qui præfecti ſunt ſuper eos in die & in nocte, nam *Michael* qui eſt ex parte clementiæ *Mamona* hoc eſt præfectus ſuper ventum Orientalem, vſque ad dimidium diei & vſque ad noctem, regitque ventum occidentalem *Raphael* qui etiam eſt ex parte clementiæ, tum *Gabriel* in virtute iudicii & ſeueritatis præfectus eſt vento boreali ſuper mediam noctis & duas meſuras mundi, *Noriel* vero præſidet Auſtro, Hæc ille, Et *Liber Arcanorum* agnoſcit, quod iſti præſides plures habent ſub ſe ſpecies ſeu legiones. Cui *Ioseph Caſtaliensis* in libro dicto *Porta lucis* aſtipulari videtur, dicens, quod à terra vſque ad firmamentum non ſit locus vacuus, ſed omne plenum formis, ex illis puræ, ex illis capaces gratiæ & miſerationum, & ſunt inferius multæ effigies factæ, noxiæ, tentatrices, & omnes commorantes & volantes in aere: Et alibi *Ioseph Caſtaliensis* habet hæc, A terra ad firmamentum vſque non eſt locus vacuus, quin totum ſint ſpecies, ex illis ad pacem, ex illis ad bellum, ex illis ad bonum, ex illis ad malum, ex illis ad vitam, ex illis ad mortem: Et omne id in habitatione inferiori, in qua nos ſumus, Atque hi omnes ſpiritus ſi boni à bonis ventis angelicis animantur, ſi mali à malis: vnde manifeſte liquet, quod illi venti, qui apud Peripateticos & etiam nos vulgares pro naturalibus impreſſionibus habentur, ſi ad philoſophiam occultam, referuntur ad ordines ſpirituum. Hinc etiam in ſacra pagina legitur: *Spiritus procellarum qui facit verbum*, *Pſal. 148.* Et alibi; *Qui facis angelos tuos ventos*, &c. *Pſal. 104.* Porro etiam de Angelis in quorum eſt poteſtate ventorum vis mentionem facit *Apocalypſis* cap. 7.

Quatuor etiam regionis ſublunaris elementa vt ſunt natura diuerſa ita etiam diuerſos ſibi vendicant duces atque præfectos iſtis à Deo inſtitutos, ſub quorum imperio magnæ exiſtunt ſpirituum ſeu dæmonum turbæ, quarum quæ ſub imperio *Seraphin* ſunt ignea ſunt indutæ natura, atque ob hanc cauſam naturali inclinatione elementum igneum eligunt pro ſua patria; at ſi extra illius limites deorſum magis deſcenderint, (quod ſapicule in Martis dominio in cælo accidit) tonitrua, coruſcationes & fulgura atque id genus aliæ producunt in aere, propter conflictum illum, quem aquei ſpiritus habent cum iis. Pari ratione in corpore humano videmus, quod humor bilioſus ſeu ſanguineus extra locum & ſedem ſuam connaturalem putreſcit, & perturbat aerem humanum meteoris calidis, & morbos inducit. Hoc idem quod de igneis ſpiritibus dictum eſt, de aereis, & aqueis, atque terreis eſt intelligendum, qui ſuis ducibus ſubſeruiunt, & naturali conatu elementum illud in quod ipſorum princeps habet dominium pro ſua patria eligunt: vnde aerei, aquei; & terrei dicuntur ſpiritus, quippe qui de talibus naturis magis participant.

Denique ſecundum Cabaliſtarum & Doctorem Hebræorum doctrinam concipimus, quod 72. ſint angeli fortes totius terræ, quorum aſſiſtentia *Moyſes* dictus eſt mare rubrum diuiſiſſe: nam iſti Angeli dicuntur ab iſtis Angeli diuiſionis, aiuntque Deum terram iuxta horum angelorum numerum diuiſiſſe, vnde in libro dicto *Porta Iuſtitie* legimus; Quod relictae ſint omnes gentes, & tradita in poteſtatem ſeptuaginta præfectorum, hoc eſt Principum angelorum, atque hi dicuntur ſolere eſſe familiares hominibus, & præſides eſſe ſeptuaginta duarum regionum terræ, vt *Reuchlinus* habet, qui in libro 3. *De arte Cabaliſtica* eorum nomina iuxta *Rabi Salomonis* & aliorum ſententiam eos hoc modo recensere aggreditur.

*Vehuiah, Ieliel, Sirael, Elemiah, Mahafiah, Lelabel, Achaiah, Cathetel: Haziel, Aladiah, Lauiah, Habaiah, LeZaleli, Mehabel, Haniel, Hakamiah, Louiah, Caliel,* & ſic in cæteris vti in loco antea citato reperire fas eſt.

Atque ita omnia angelorum bonorum genera habetis iuxta mundi partitionem diſtincta atque diuiſa: quod nihilominus in magia verſati Literis ſacris, vt pote quæ cum iſtis ſymbolizant, referre videntur: Literæ Sanctæ dicuntur eſſe Symbola ad res creatas atque conſequenter angelis qui aſſignantur illis rebus creatis vti infra declarabimus.

CAP.